

LACVS CON- STANTIENSIS.

Lacum Constantiensem cū circūiacente regione nouis ob id accen-
suimus tabulis, quod ob sui magnitudinē mare quodammodo sit,
& littora eius frequenti hodie hominum habitatione colantur, adia-
censq; terra mira fertilitate prędita sit, uinetis potissimum & arbu-
stis abundans. Diuiditur autem in superiorem lacum & inferiorem. Superior
olim Brigantinus, Acronius & secundum alios Acromus, & Podamicus atq;
Rheni lacus fuit appellatus. Inferior uero, Venetus. Brigantinus, ab urbe Bri-
gantij, sicut hodie Constantiensis à Constantia uocatur. Acronius, quasi sine
frigore, quod nunquam glacie in uniuersum obducatur. Acromus, Germani-
ca corrupta uoce, quasi kromsee, id est, obliquus & arcuatus lacus. Nam à Bri-
gantio & Rheni illapsu usq; ad Constantiam, in arcus cuiusdam formam infle-
ctitur. Alterum uero, quem hodie Cellensem uocant, scribit doctissimus Va-
dianus Venetum appellatum, à colore marino qui caruleus est. Quare autem
Podamicus & uulgo Bodensee nominetur, habes apud eundem in epistola ad
Rudolphum Agricolum. Sed & Thomas Blaurerus patricius Constantiensis
de hoc lacu ita scribit. Totum Rheni superioris prospectum mirū in modum
ornauit natura. Temporum uarietas mutauit uocabula quædam populorum
& locorum, sed in tabula conspicias immutabilem faciem lacu, & quæ nūc sint
nomina, ex inscriptionibus lector colliges. His finibus quondam situm Gan-
nodurum prisca ætas commendauit, hodie autem Constantia locum præci-
puum obtinet. Ea urbs ut apparet ex edificijs ac ciuium imaginibus, ante con-
cilium, quo combustus est euangelij præcurfor Hussus, celeberrima fuit. Post
concilium, deflorescere cœpit. Ceterum speculantibus è ponte Constantię su-
prà apparent Alpes Rheticæ & totus ille tractus lacus Brigātini & Acronij.
Inde se condit, quem usitatissimo nomine uocant Podamicum. Is enim sinus
recedit à flumine uersus arcem Bodmen, sed uulgo Podamicum uocāt illū to-
tum recte & ueteres. Quin eruditos audiui ποταμιον nominare, quod per hunc
Rhenus uelut in alueo dēscendat nusquam resolutus. Suis autem fontibus la-
cum hunc transuersisq; fluminibus ac torrentibus & scaturiginibus magis q̃
Rheni oppleri uerisimile est, ut tantum iter quod instat Rheni, is la boret ual-
de compositus arripere. Sed magno miraculo est, quod à ponte uicinū lacum
Venetum inter suburbium paradisum, & hinc urbis illinc Enandrensiū pa-
scua, exili placidoq; maxime cursu allabatur, is quem tot amnes in lacum rece-
pti comitantur. Fit id forte propter orarum planiciem. In medio aluei, qua ur-
bem interfluit, pedū quinquaginta altitudine crater seu uallis subest, ubi uno
sæpe iactu piscatoris milia triginta, sæpe quadraginta piscium trahunt. Nume-
rant autem non nisi ad halecum magnitudinem accedentes. Nec longe ab eo
loco ubi in subiacentem lacum ingreditur, ubiq; castellum est Gotlieb, uadum
habuisse ferunt: Inferiorem autem lacum excedens, ubi Scaphusiam præterijt,
horrendo casu exhibet spectaculum peregrinis, ita ex arduo præ-
cipitio ruens, uelut sub nubibus ædito mur-
mure tonat.